

**BERITA ONLINE
BERITA HARIAN
TARIKH : 30 DISEMBER 2021 (SABTU)**



Bajet 2022: MOSTI fokus R&D, inovasi, revolusi industri

Oleh [Safeek Affendy Razali](#) - Oktober 30, 2021 @ 11:07am

safeek@bh.com.my



Menteri Sains, Teknologi dan Inovasi Datuk Seri Dr Adham Baba.

KUALA LUMPUR: Kementerian Sains, Teknologi dan Inovasi (MOSTI) komited melaksanakan pelbagai inisiatif dengan tumpuan kepada matlamat untuk memulihkan kehidupan serta mata pencarian rakyat.

Melalui peruntukan dicadangkan dalam Bajet 2022, kementerian berkenaan fokus kepada tiga perkara, iaitu mempergiatkan aktiviti pembangunan dan penyelidikan (R&D) dan Hab Inovasi, selain Revolusi Industri Keempat dan juga strategi 'MyStartup'.

Menterinya, Datuk Seri Adham Baba berkata, MOSTI merancang menggunakan peruntukan sebanyak RM520,275,400 bagi tujuan mengurus dan baki RM386,721,500 lagi bagi tujuan pembangunan daripada keseluruhan bajet kepada kementerian berkenaan berjumlah lebih RM906 juta.

"Kementerian bermotivasi dan komited untuk melaksanakan pelbagai inisiatif yang dirangka dan akan memberi tumpuan kepada matlamat untuk memulihkan kehidupan serta mata pencarian rakyat.

"Ini bersesuaian dengan tiga bidang fokus Bajet 2020 iaitu 3R, 'Recovery' (memulih), 'Resilience' (membina daya tahan) dan 'Reform' (menyusun semula) yang membuktikan keprihatinan kerajaan terhadap Keluarga Malaysia," katanya dalam satu kenyataan, hari ini.

Dr Adham berkata, kerajaan menyediakan RM423 juta di bawah MOSTI dan Kementerian Pengajian Tinggi bagi mempergiat aktiviti R&D.

"MOSTI akan menyediakan sokongan menerusi pembiayaan R&D dengan fokus kepada penyelidikan pembangunan eksperimental.

"MOSTI amat menghargai keprihatinan kerajaan untuk memacu aktiviti R&D khususnya peringkat penyelidikan pembangunan eksperimental oleh industri, institusi pengajian tinggi dan agensi-agensi penyelidikan kerajaan agar dapat menjana pendapatan menerusi usaha pengkormesialan produk dan teknologi tempatan," katanya.

Katanya, RM30 juta pula diperuntukkan bagi melaksanakan Hab Inovasi: Revolusi Industri Keempat di bawah Technology Park Malaysia (TPM) sebagai pusat sehati untuk ekosistem inovasi dengan pembangunan teknologi baharu muncul seperti dron, robotik dan kenderaan berautonomi.

Menerusi program strategi MyStartup oleh Cradle Fund Sdn Bhd yang bertindak sebagai agensi penyelaras ekosistem pemula, sejumlah RM20 juta diperuntukkan untuk memulih dan membina daya tahan syarikat-syarikat pemula yang berpotensi.